

## Namba wan leta prom Pita

### *Griting prom Pita*

<sup>1</sup> Diswan mi ya Pita, wan misnareman blo Zizas Kraist.

Ai raitte dis leta po dem pipol wea God i bin suzem uda stap wase ol streinza lo dem eria blo Pontos, Galasia, Kapadosia, Eiza ane Batinia.

<sup>2</sup> God bin suze yumpla de longtaim bipo. Ane God bin meke yumpla oli prom da paua blo da OliSpirit, solong po mata mekem wanem Zizas Kraist i wandem, den yumpla i go kam klin prom da blad blo Kraist.

Ai prea po God po gibe yupla spesilpeiba ane pis, mo ane mo.

### *Tingking blo longlaip poeba*

<sup>3</sup> Ebridem ona go po God, da PapaGod blo da BosLod blo yumpla Zizas Kraist. Bikoz prom dat nadakain sorewei blo em, God i bin meke yumpla po bon gen gad niulaip. Nau yumpla stap wea prapa gud sabe bikoz Zizas Kraist i bin gedap laipgen prom ded. <sup>4</sup> Ane God i gad prapa diating po gibem po ol pikinini blo em. I dat longlaip poeba wea yumpla kan pute prais. Dis longlaip poeba i de stap antap eben po yupla, ane i mata stap branniu, kan kam oul. <sup>5</sup> Ane God wea dat big strongpaua blo em, go lugaut yupla antil yupla gobi seib, bikoz yupla bin bilib em. Ane em go wantaim soem lo dat lasdei po ebriwan po luk.

<sup>6</sup> So mata stap gad apipiling, bikoz i gad nadakain gud apitaim de po kam. Nomata diskaintaim yupla i gad atso prom olkain trabol, i mata po sotwail. <sup>7</sup> Demkain ting i mata po teste bilib blo yupla, ip i strong ane tru. I bin testem wase paia bane da gold, dati i poldaun ane mata da gold i stap klinwan, ane bilib blo yupla i prapa mo dia po God den da gold wea i ken pinis. So ip bilib blo yupla stap strong apta prom dem olkain trabol, yupla i go gede plenti preiz, spesilblesing ane ona lo dat dei wen Zizas Kraist i go kambaigen ane ebriwan i go luk em.

<sup>8</sup> Nomata yupla i no bin luk Zizas lo ai blo yupla bat yupla i prapa lab em. Nomata ya nau yupla no bin luk em, bat yupla bin mata trase em ane nau yupla i api lo prapa nadakain spesil apiwei wea i kan no eksplein. <sup>9</sup> Dis riwod po bilib wea Kraist i diswan ya, yupla gobi seib.

<sup>10</sup> Diswei nau blo God po seibe ol pipol, i wanem dem spesilmesizman blo God i bin prapa wande sabe mo baut. Dempla i bin pris ol mesiz blo God baut dis gudpasin blo God po seibe ol pipol wea em bin mekem redi po yupla. Nomata dempla i bin gad plenti kuestin po aske demplaselp baut wanem ol demting i bin min, bat dempla i bin kip prise dem mesiz. <sup>11</sup> Dempla i bin prapa wande sabe wanem da Spirit blo Kraist insaid dempla i bin tokbaut wen da Spirit i bin spik dempla pas, dat Kraist go gad ol atso prom ol trabol ane da truglori ane paua wea God i go gibem po em apta. Dempla i bin prapa wande sabe wattaim ane po uda ol demting i go apen.

<sup>12</sup> God i bin soe dem spesilmesizman dat demting i nogo apen lo laiptaim blo dempla, bat plenti iya apta lo laiptaim blo yupla. Tru da paua blo da OliSpirit blo God wea God i bin sanem kamdaun prom eben, dempla i bin tokbaut dis seim Gudniuz baut Kraist, ya nau yupla i lisen. Ane i prapa nadakain gud tu, ol dem einzel i prapa wande luk demting wanem i apen nau.

### *Stap seimkain wiskain God i stap*

<sup>13</sup> So nau, tingk prapa klia wanem yupla go mekem ane kontrol yuplaselp. Mata luk go prant po dat spesilblesing wea yupla gobi seib, dat blesing wanem i go kam po yupla wen Zizas Kraist i go kambaigen. <sup>14</sup> Lisen po God bikoz yupla i ol pikinini blo em. Yupla mas no gobaigen po stap wea dem nugudwei wea yupla i bin stap pas, wea yupla no bin sabe wiskain po stap wea nadawei. <sup>15</sup> Bat nau yupla mas stap oli lo ebriting wanem yupla i mekem, seimkain wase God uda bin suze yupla, i oli. <sup>16</sup> Bikoz God emselp i bin spik wea i bin raitem wea Baibol diskain ya, 'Yupla mas mata stap oli, bikoz ai oli.'

<sup>17</sup> Ane yupla mas rimemba dat PapaGod de antap lo eben wea yupla i prea po, em nogad no peibretwan wen em i go zaze ol pipol. Em i go zaze ane riwod yupla po demting wanem yupla i bin mekem. So yupla mas stap ya lo dis wold wase streinza. Yupla mas soe prapa prait ane rispekt po God. <sup>18</sup> Yupla mas tekenotis God i bin pei prais po seibe yupla prom dat bipolaip wea i nogad no mining wea yupla i bin gedem prom ol ate blo yupla. Dat ate no bin pei prais

wea gold ane silba wea i go pinis. <sup>19</sup> Bat God i bin pei po yupla lo prapa nadakain dia blad blo Kraist, da prapa klin Smolsip blo God. <sup>20</sup> God i bin suze Kraist bipo em bin meke da wold, ane lo dem lasdei ya, em bin kam po ert po ebriwan po luk. Ane God i bin meke diswan po yupla.

<sup>21</sup> Bikoz prom laip blo Kraist yupla i mata bilib wea God. Em nau i bin meke Kraist gedap prom ded kam po mata stap gad longlaip poeba. God i bin teke em go antap ane nau em stap wea da sainilait, dat truglori blo God. Bikoz prom diswan yupla ken bilib ane gad prapa tras lo God.

<sup>22</sup> So nau yupla ken gad tru lab po wananada wase bala ane sisi, bikoz yupla i bin kam klin prom sin blo yupla wen yupla i bin teke da tru mesiz blo da Gudniuz. So yupla mas soem dat yupla prapa lab wananada wea pul at blo yupla.

<sup>23</sup> Yupla i bin bon gen gad niulaip. Dis niulaip blo yupla i no bin kam prom yupla papa ane mama, bikoz dat laip wea demtu i bin gibe yupla i go ded. Bat dis niulaip i go mata stap poeba bikoz i kam prom dem wod blo God wea i stap laip poeba. <sup>24</sup> Baibol i bin spik diskain:

‘Pipol i wase gras wea i kam drai ane ded.

Dempla luze kala blo dempla prapa kuikwan wase dem nais kala plaua wea bus.

Da gras i kam slaik, ane dem plaua i poldaun ded.

<sup>25</sup> Bat da mesiz blo da LodGod i go mata stap poeba.’

Dis mesiz nau i da Gudniuz wea i bin prisem po yupla.

## 2

<sup>1</sup> Yupla mas stap nau nomo peibaik, nomo lai ol pipol, yuze laiwei. No akt wase yupla gud o wase ol tupes pipol. Nomo zeles ane no kareyan.

<sup>2</sup> Yupla mas prapa anggre po dat milk wea i da wod blo God, so yupla i go gro kam prapa gad sens baut wiswei God i seibe yupla. Yupla mas prapa anggre po dis wod wase niu beibi i anggre krai po milk, <sup>3</sup> nau yupla sabebaut wiskain prapa gudpasinwei da BosLod i gad.

### *Dem meinston blo aus blo God*

<sup>4</sup> Yupla kam klostu po da BosLod uda i da meinston blo da Tempol blo God ane em i mata stap laip. Em nau wea ol pipol i bin meke em rabis, bat God i bin suze em ane meke em impotent.

<sup>5</sup> Lete God zoine yupla wase ston wea i gad laip, po kam tugeda wase tempol blo God. Ane zob blo yupla i po bi oli prist blo em ane po meke spesil opring prom spirit blo yupla po meke em api bikoZ prom Zizas Kraist. <sup>6</sup> Seimkain wiskain Baibol i spik:

‘Ai pute wan timba insaid Zarusalem,  
em da meintimba,  
ane eniwan uda bilib lo em  
i nogo pil nugud ane sem.’

<sup>7</sup> Wa, em i prapa spesil po yupla uda bilib. Bat po demwan uda no bilib, em  
‘Da timba wea dem bilda i bin sakwei,  
i nau da meintimba.’

<sup>8</sup> Ane Baibol i spik diskain tu:

‘Em i dat meintimba wea i meke ol pipol po bang wea dat timba ane dempla poldaun.’

Wa, dem pipol uda i bang ane poldaun i demkain bikoz dempla no mekem wanem da mesiz blo God i spik. So datwan i plan blo God po dempla uda no lisen po em.

<sup>9</sup> Bat yupla no demkain wase dempla. Yupla i ol pipol wea God i bin suzem. Ane yupla i blo aus blo king ane prist, ol oli pipol blo God. Ane yupla i blo em, so yupla ken soe ol nada pipol da gudwei blo God, bikoz em bin singaut yupla kam ausaid prom dat dakples, kam po dat prapa nadakain gudlait blo em. <sup>10</sup> Baibol i spik diskain:

‘Wea wantaim yupla no bin ol pipol,  
bat nau yupla i ol pipol blo God.  
Wea wantaim God i no bin soe yupla sorewei blo em,  
bat nau God i soe sorewei blo em po yupla.’

<sup>11</sup> Mai bala ane sisi, yupla i streinza ane ausaid pipol. So ai wone yupla po stap longwei prom nugudwei bikoz demting i pait gense spirit blo yupla. <sup>12</sup> Prapa lugaut wiskain yupla i stap midel wea dem neiba uda i no bilib. Iben ip dempla i spik yupla i bin meke rong, dempla i go luk dem gudsamting wea yupla i mekem, ane dempla i go bilib ane gibe ona po God wen em go kam po zaze da wold.

### *Rispekt pipol uda kare lo*

<sup>13</sup> Mekem wanem da BosLod i wandem. Yupla mas pole demwan uda kare lo wase king uda i bos, <sup>14</sup> o dem gabana blo em. Da king i bin suze

dem gabana ane em bin gibe dempla da rait po panis demwan uda i meke ol rongting ane ona demwan uda i meke ol raitting.

<sup>15</sup> God i wande yupla po mata meke ol gud-samting solong i go stape demwan uda i meke laitok gense yupla. <sup>16</sup> Yupla i no sleib, yupla i pri. Bat da priwei blo yupla i mas no meke no nugudting. Yupla i pri po stap wase sleib blo God. <sup>17</sup> Yupla i mas soe rispekt po ebribodi. Lab yupla amenbala ane amensisi ane labe ol amenpamle tu. Yupla mas prait prom God ane mas soe rispekt po da king.

### *Ol sleib*

<sup>18</sup> Yupla uda i sleib mas mekem wanem bos blo yupla i wandem. Meke ebriting wanem dempla i spik yupla po mekem, nomata dempla i trite yupla wea gudwei o peawei o wea rapwei. <sup>19</sup> I gudting ip yupla no meke at blo yupla kamap wen ol pipol i meke trabol po yupla, bikoz yupla sabe yupla blo God. Wen yupla i mekem diskain yupla meke God prapa api. <sup>20</sup> Nobodi go preize yupla ip yupla meke rong ane i go panis yupla, God i nogo preize yupla tu. Bat ip yupla meke raitting ane trabol i kam po yupla, no meke at blo yupla kamap. Wen yu mekem diskain yupla meke God prapa api.

<sup>21</sup> Kraist, i bin sapa po yupla, i piksa po yupla. Pole wei blo em. So dem trabol i pat blo plan blo God po yupla po go tru. <sup>22</sup> Baibol i spik:  
'Em i no bin meke no sin gense God,  
ane nating laitok bin kamaut prom maut blo em.'

- 23 Wen ol pipol i bin spik ol nugudtok gense em,  
em no bin ansabaik dempla.  
Wen em bin sapa, em no bin meke seimkain baik  
po dem pipol.  
Em bin mata libe demting lo an blo God, uda  
i ebritaim zaz lo peawei.
- 24 Wen Zizas Kraist i bin ded,  
em bin kare ebridem sin blo yumpla wea  
oun bodi blo em lo da kros,  
so yumpla i kan ded nau prom dem sin  
bat mata stap wea rait wei.  
Yupla i bin kamgud nau prom dem badting wea  
em i bin sapa.
- 25 Yupla i bin wase ol sip wea i bin gowei prom  
dat rait rod.  
Bat nau yupla i bin kambaigen po pole da  
Bos blo lugaut sip,  
da wan uda i lugaut laip blo yupla.

### 3

#### *Ol maretoman*

<sup>1</sup> Wa, yupla dem maretoman, yupla mas rispekt dem man blo yupla uda kare lo, iben ip dempla no wande pole da Gudniuz. Dem gudlaip blo yupla wea God, i go spik po dem man, ane laip blo yupla i mobeta den eni tok. Mait laip blo yupla i go wine dempla po pole Kraist, <sup>2</sup> wen dem man blo yupla go luk da klin Godwei wea yupla.

<sup>3</sup> No woribaut meke yuplaselp luk nais were ol zulari, meke olkain spesil eyastail ane were ol plasklos po meke yupla luk nais ausaid. <sup>4</sup> I



mobeta ip yupla i gad gudat ane kuaiatwei. Diswan nau i prapa meke God api. <sup>5</sup> Demwei i bin blo dem oli oman blo God blo bipotaim. Dempla i bin prapa bilib ane trase God ane dempla i bin soe rispekt dat dem man blo dempla i kare lo. <sup>6</sup> Teke wei blo Sera. Em bin obei man blo em, Eibram, wen em bin kolek bos. Yupla i ol gel blo Sera tu. Ip yupla i meke ol raitting, yupla nogo prait prom eniting wanem man blo yupla mait go mekem.

### *Ol maretman*

<sup>7</sup> Wea da seimkainwei, yupla dem maretman i mas ona oman blo yupla. Trite oman blo yupla wea rispekt. Stap gudwei tageda wea oman blo yupla ane rimemba dempla nogad strong bodi wase yupla, bat dempla stil sere da seim niulaip wea God i bin gibe yupla. Ip yupla i no trite dempla diskain den God i nogo ansa prea blo yupla.

### *Ol Kristian*

<sup>8</sup> Lastok ya. Yupla ebriwan i mas gad pis ane sorewei po wananada. Yupla mas prapa labe wananada wase bala ane sisi. Yupla mas gad gudat ane prapa ambol yuplaselp. <sup>9</sup> Yupla i mas no peibaik dem nugudting baigen. Ane yupla i mas no spik nugudting baigen gense demwan uda i spik nugudting baut yupla. Bat mata prea po God po blese dempla, bikoz diswan nau i wanem God i wande yupla po mekem, den em go blese yupla po mekem diskain. <sup>10</sup> I raitem wea Baibol diskain ya:

'Ip yupla wande gud api longlaip,

yupla no spik ol nugudtok ane no spik eni  
laitok.

<sup>11</sup> Tanewei prom meke ol nugud samting,  
ane mata meke ol gudsamting.

Stap wea kuaiatwei ane kipe pis wea ebriwan.

<sup>12</sup> Da LodGod i lugaut demwan uda meke raitting,  
ane talinga blo em i mata lisen po demkain  
pipol ane ansa prea blo dempla.

Bat LodGod i prapa go gense dem pipol uda i  
meke ol nugudting.'

### *Atso prom trabol prom meke gudting*

<sup>13</sup> Wiswei? Uda nau i go wande meke ol  
nugudting po yupla, ip yupla i bin mata meke  
ol gudting po dempla? <sup>14</sup> Bat nomata ip ol pipol i  
meke trabol po yupla bikoze yupla i meke raitting.  
God i go riwod yupla. So yupla mas no prait  
ane no wori. <sup>15</sup> Bat truwan nau, yupla mas  
wosip Kraist bikoze em BosLod blo laip blo yupla.  
Yupla mas ebritaim redi po ansa dem pipol uda i  
askem baut bilib blo yupla wea God. <sup>16</sup> Bat yupla  
mas ansa dempla wea naiswei, gad rispekt po  
dempla. Meikso at blo yupla i mata stap gud ane  
tingking blo yupla i mata stap klia. So ip pipol i  
go tok nugudtok baut yupla, bat den wen dempla  
i go luk da gudwei wea yupla, dempla i go sem  
prom wanem ol i bin spik. <sup>17</sup> Ip i wei blo God  
po meke yupla po go tru nadakain atso prom ol  
trabol bikoze yupla meke ol gudting, datwan i gud.  
Bat i nugud ip yupla gad nadakain big atso prom  
dem trabol wea yu yuselp i mekem.

<sup>18</sup> Kraist i bin gad nadakain atso tu prom ol trabol wen em bin ded wantaim po ol dem rongting wea ol pipol i bin mekem. Em no bin meke no wan sin, bat em bin ded po ebribodi solong em ken teke yupla kam seipwan po God de wea eben. Pipol i bin kile bodi blo em bat God i bin meke em gedap laipgen.

<sup>19</sup> Wen Kraist i bin ded, spirit blo em i bin go pris po dem spirit blo dem pipol uda i bin trap wase prizina, <sup>20</sup> wea dat seimtaim bipo dempla no bin mekem wanem God i bin wandem. Dat taim God i bin weit wea kuaiatwei wail Noa i bin bilde dat bigbot. Mata eit pipol God i bin seibem midel wea da big pladwata. <sup>21</sup> Ane dat big pladwata i piksa blo baptaiz wea distaim nau i seibe yupla tru paua blo Zizas Kraist wen em bin gedap prom ded. Ane dis baptaiz i no min i wase dati prom bodi blo yupla. Dis baptaiz i piksa wea yupla i aske God po meke yupla gad klin at ane tingking tru Zizas Kraist uda bin gedap laipgen prom ded.

<sup>22</sup> Nau Zizas i bin go ane stap de wea eben. Ane em i sidaun antap wea da ples blo ona wea said blo God. Ane ol dem einzel, ane demwan uda kare lo ane ebridem paua, ol i baudaun pesdaun prant wea em po soem dat em mata da wan uda kare lo.

## 4

### *Stap po God*

<sup>1</sup> Bikoz Kraist i bin sapa wea nadakain nugud pein, wea seimkainwei tu yupla mas redi po sapa. Ip yupla bin sapa, dasmin yupla bin pinis

meke yupla main nau po stap prom nomo meke sin. <sup>2</sup> Ane yupla nomo go gad main po meke nugudting, bat yupla go prapa wande kip mekem wanem God i wandem po aulong yupla i go stap laip. <sup>3</sup> Yupla i prapa taiat prom dem nugudting wea dem pipol uda no sabe God i bin mekem de pas: ol nugud sekssin, man ane oman uda bane ai po tingbaut ol man ane oman, meke tumas big pati, drongk, meke wail pati, wosip ol laigod ane meke ol prapa nadakain nugud opring po wosip dem laigod.

<sup>4</sup> Wa, dem pas pren blo yupla i prapa atzamp wen yupla nomo zoin wea dempla po meke dem nugudting, so dempla i mata daune yupla. <sup>5</sup> Bat demkain pipol i go stanap prant wea God po spik wanem ol i bin mekem. Em i go zaze ebribodi uda i laip ane uda i ded. <sup>6</sup> Daswai da Gudniuz i bin prisem po demwan uda i bin ded tu, so nomata bodi blo dempla i ded, bat dem spirit blo dempla i go mata gad longlaip poeba wea God.

<sup>7</sup> End blo da wold i klostu nau. Yupla mas kontrol sens blo yupla, stap weik, kontrol yuplaselp den yupla ken prea lo gumat. <sup>8</sup> Da prapa impotent ting prom dem nadating wea ai bin spik i diswan ya, yupla mas soe prapa biglab po wananada. Wen yupla i mekem diskain den yupla nogo wail gense dem rongting wanem dempla i mekem. <sup>9</sup> Yupla mas wea gumat mata meke gudpasin po demwan uda nogad no kaikai o lete dempla uda nogad no aus po stap wea yupla.

<sup>10</sup> God i bin gibe yupla ebribodi olkain gipt. Yuze dem gipt po elpe ol nada pipol solong dem

gudsamting blo God i go soem tru yupla. <sup>11</sup> God i bin spik yupla po pris wod blo em, den yupla mas rimemba dem wod i blo God ya wea yupla i pris. Ane ip em bin suze yupla po elpe ol nada pipol, mekem wea ebridem strong wea God i bin gibem po yupla. Den ebridem samting wea yupla mekem tru Zizas Kraist, dat preiz i gobaik po God. Yumpla ebribodi go liptemap neim blo Zizas ane preize em bikoz prom big paua blo em, ane dis big paua blo em i mata go go, no sabe pinis. Amen.

*Atso prom trabol bikoz yupla i Kristian*

<sup>12</sup> Mai amenpamle, no atzamp prom dem badting wea yupla i go tru, wea yupla i no bin luk bipo, wea i kam po teste yupla. <sup>13</sup> Bat yupla i mas mata stap gad apipiling, bikoz ol dem trabol i seimkain wase Kraist i bin go tru. Den apta, yupla gobi prapa api bikoz yupla go luk da brait sainilait, da truglori ane paua blo em wen da prapa gudlaip blo Kraist i go kamaut kliawan wea ol pipol i go luk.

<sup>14</sup> Ip ol pipol i spik ol prapa nugudtok po yupla bikoz yupla prapa bilib lo Zizas Kraist, mata bi api, den Spirit blo God i go kam antap lo yupla. <sup>15</sup> Ip yupla i gad atso prom ol trabol, dem trabol i mas no kam prom bikoz yupla bin kile man, prom stil, meke badting, o tokbaut ol nada pipol bisnis. <sup>16</sup> Bat i nogad no sem po go tru ol trabol bikoz yupla i Kristian. Mata preize God po dat prapa nadakain gudneim blo em. <sup>17</sup> Da taim i ya nau po God po zaze ol pipol, ane em i mas stat wea ol pipol blo God. Ane ip em i go zaze ol

pipol blo em pas, den i gobi prapa monugud po demwan uda prapa no bin bilib da Gudniuz blo God. <sup>18</sup> Ane Baibol i spik:

‘Demwan uda i pole wei blo God,  
 i go gad plenti trabol,  
 ane i prapa ad po go tru demting po bi seib.  
 Bat demwan uda no pole wei blo God,  
 i gobi prapa moad po dempla. Dempla nogad  
 no sans.’

<sup>19</sup> So ip yupla i gad atso prom ol trabol bikoz prom mekem wanem God i wandem, den yupla mas kip meke raitting ane kip trase God uda bin meke yupla, bikoz em nogo lete yupla daun.

## 5

### *Tok po ol soselda ane yangman*

<sup>1</sup> Ai raite dis pat ya blo dis leta po dem soselda uda i de wea yupla insaid lo sos. Mi, ai soselda tu, ane ai spik prom at blo mi bikoz ai bin luk dem trabol wea Kraist i bin go tru. Ane ai tu go sere da sainilait, dat truglori blo em, wen em go kambaigen. Bikoz ai pat blo dem soselda tu, ai spik gudwei po yupla. <sup>2</sup> Yupla mas prapa lugaut dem pipol wea God i bin gibem po yupla. Prapa lugaut dempla lo gudad. No mekem po gede mani, mekem bikoz yupla wande mekem no bikoz dempla pose yupla po mekem. Bat lugaut dempla seimwei wiskain yupla i serbe God. <sup>3</sup> Yupla i mas no meke yuplaselp wase bos antap dem pipol blo God. Nono. Yupla i mas lide dempla gudwei solong dempla i go lane dat seimwei. <sup>4</sup> Ane wen da Big Bos blo lugaut ol

sip blo God i go kam, em i go riwod yupla wea truglori ane ona poeba.

<sup>5</sup> Yupla dem yangpipol uda i gad bilib mas mekem wanem dem soselda i spik yupla po mekem. Ane yupla ebriwan mas elpe wananada wea ambolwei, bikoz i spik wea Baibol:

'God i stanap nadasaid gense dem pipol uda tingk dempla aiklas,  
bat em i soe gudpasin blo em po dem pipol uda i soe ambolwei.'<sup>☆</sup>

<sup>6</sup> So prapa ambol yuplaselp andanit da nadakain strongpaua blo God, ane wea taim blo em bambai, em go ona yupla. <sup>7</sup> Yupla mas gibe ebridem wori blo yupla po God, bikoz em lugaut yupla.

<sup>8</sup> Lugaut nau! Yupla mas mata stap weikwan. Satana uda i enami blo yupla, em i wagtaw wase wan wail laian uda i lukraun po enibodi po kaikai. <sup>9</sup> Yupla stanap strong gense em, ane stap strong lo dat bilib wea yupla i gad. Ane yupla mas tingbaut dem Kristian bala ane sisi ebriwea raun dis wold. Dempla i go tru dat seimkain atso prom ol trabol wiskain yupla i go tru.

<sup>10</sup> Apta wen yupla i bin gad atso prom dem trabol po sotwail, God i go meke yupla gudgen. Em go elpe yupla ane meke yupla kam nadakain strong lo bilib wea em. Bikoz prom dat prapa gudpasin blo God, em i singaut yupla po stap lo da sainilait, dat truglori blo em wea i mata go poeba bikoz prom mata bilib lo Zizas Kraist.

<sup>11</sup> Ebridem paua i blo em poeba ane eba. Amen.

---

<sup>☆</sup> 5:5 Proberb 3.34

*Lastok blo Pita*

<sup>12</sup> Ai bin raite dis sot leta ya po yupla wea elp blo Sailas, uda ai prapa rispekt ane em i prapa amenbala blo mi. Ai raite dis leta ya po inkariz yupla ane spik yupla da spesilpeiba blo God i stap wea yupla nomata wanem i apen.

<sup>13</sup> Ane da sos ya wea Babilon wea God i bin suzem seimkain wase yupla, i spik alo. Ane mai boi Mak tu i spik alo. <sup>14</sup> Spik alo po wananada wea lab blo amenpamle ane kise dempla wea dat amenpamle lab.

Pis po yupla ebribodi uda i blo Kraist.



**Baibol Tores Streit Yumplatok  
Portions of the Holy Bible in the Tores Strait Creole  
language of Australia**

copyright © 2016 Wycliffe Bible Translators

Language: Yumplatok (Torres Strait Creole)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-04-12

---

PDF generated using Haiola and XeLaTeX on 12 Apr 2024 from source files dated 31 Aug 2023

c8c0e94f-9450-57a6-8f0d-5fc522bea602